



ЛҮИМА СЭРИПОС

www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года

27 февраля
2015 года
№4
(1094)



С. Ромбандеева вӑрум хури

Ты хурит Хальӱс район Лӱпмус пӑвыл ойка Михаил Васильевич Леятов
пӱслым ӱлы. Тав урӱтыл мӑньполь ӱтпос газетат тах ловиньтӱн.

Ты
номерт
ЛОВИНЬТӱН:

Хальӱс миркол
кӱщаиг
Хулюмсунт
пӑвылн ӱхталасӱг

4

Тав ӱльпа
тӑрыл
пормас вӑри

7

Кӑсың хумн
ӱрнӑ ӱнтап

9

Половинка
пӑвылт рӱпитан
школа

12

ӱргын-йӱквнӑ
ханты мӑхум

16

Ань лусытан махум урыл ляххал

Хум хөтпат янытлан хөтал элы-пал хөталт округ военный комиссарыг өлнэ хум Юрий Михайлович Буров ёт пресс-конференция олыс. Тав ань өлнэ армияв урыл потыртас.

– 2014 талныл мән округув янытыл сатлов хөтпа контракт щирыл армият лусытэгыт. Ань мән армиявт машинат, танкыт, товлыңхәпыт, нәиңхәпыт пуссын ийльпит. Мән мав ну-пыл матыр вәрмал те ёмты, мән армияв ват кум сыс хөнтлан магсыл атхаты. Ты магсыл ма янытыл мән

армияв мак ёр армият лававе. Контракт щирыл лусытан махманув хосыт мән ёрыг ты ёмтсүв.

Салтатанув урыл лавуңкв таңхегум, ань акв тал лусытэгыт, тән магсыланыл пуссын вәраве. Нәмхотьютн ат саватавет. Касың алпыл ос этипалаг ал-пияныл, лагланыл, ка-

таныл сунсавет, нәматыр юныгтым ма алпиянылт ул вос олы.

Ущты лусытан мән миннэ пыгыт телефон хосыт потыртанэныл магсыл тит сим-картал олнтал мивет. Акватэ таквинатэн выгтэ, мөтанэ ос юв рүтанэ палт тетытэ. Та щирыл халанылт потыртан магсыл тынэ тынталнувек олы. Ту-выл ань салтатыт өшнэ маснутаныл рёгыңыг өлэгыт. Ты юи-өвыл тит тал сыс мән армиявт нәмхотьют ат польтыслүв.

Мән мәнълат хум хөтпанув тара лусытан мән миннэныл магсыл мән такос пуссын вәрёв. Тән лусытаңкв ат таңхегыт. 2014 талт ват мәнълат хум лусытан миннэ маныл оясыт. Төват ань ты мус полициян иң та тинсавет. Түйталахтынэныл щирыл тантиңанылн люль вәрёгыт. Йильпи саккон щирыл лусытан мән ат ялнэ хум хөтати ёмас рүпатан ат виве.

**Александр
ВЬЮТКИН**

Мегион үс урыл потыр олыс

Ты этпос өвыл хөталытт Ханты-Мансыйск үсн Михаил Сергеевич Игитов, Мегион үс кұщай хум, ёхталас. Тав тыт ляххал тотнэ хөтпат ёт хөнтхатыглас. Та үст ЖКХ вәрмалит хумус өлэгыт, тав китыглавес.

Ань тав та урыл потыртас, та 2014 тал сыс колытн рёг тотнэ щирыл тот хұрум авария олыс. Кұщай хум лавыс, тот рүпитан хөтпат рёг тотнэ турпат сав тал ат уральтасаныл. Кол кивырнит овтнэ турпат хосат тагыл ат пёнтыглавёсыт, пёсыг ёмтсыт, хотхарңайтавёсыт. Акваг мälтп-ащирма ёмталан хосыт төва кёртурыт ат вёритасыт, пälыг-покматасыт. Тамле вәрмал вассыг ул вос ёмталы, ты талн люлиг ёмтум кёртурыт пёнтнэ магыс савнув олн таставе.

Та үст өлнэ мир лавсыт, тән үсанылт үсхулытныл түйт сака люльсаң хот-виве. Кұщай лавыс, ювле хультум ат тал сыс

үсныл нёлоловкем сөтыра кубометра түйт хот-вуйвес. Ты тэлы ос сав түйт патыс. Туп кит этпосыг сыс яныгсат кубометра түйт үс коньпалн тотвес. Ань мөтантыг тьи магыс савнув олн тах таставе.

Михаил Сергеевич Мегион үс кұщаиг ат тал рүпиты. Ты тал сыс үсэ нөх-вөрмалтан магыс тав сав рүпата варыс. Ань тот хұрум-сат тал яныт няврамыт пуссын садикыл төвлавет. Сав тал элалы ат үнттым пүльница ань аствавес, махум тот пусмалтавет. Няврамыт магыс йильпи кас-нэ кол үнттувес. Ыс котильт хорамың кан щёпитавес ос мөт ёрнэ рүпата вәраве.

Николай МЕРОВ

Яныг үст өлнэ вәрмалит

Нижневартоск үст Алла Бадина миркол кұщай нэг олы. Тав сав тал мирколт рүпиты, үст өлнэ мир тәрвитың вәрмалыныл ёмашакв ваганэ.

Нижневартоск үст ань 300 сөтыра арыгкем элумхөлас олы. Савсыр тәрвитың вәрмалыныл урыл тән мирколн пищма акваг хансёгыт. Сав махум лавёгыт, үст түйт люльсаң хот-щёпитаве. Алла Бадина ты вәрмалы урыл лавыс, төва порат хөтал сыс сав түйт паты, тән үсхулыт хот-систамтаңкве ат вёрмёгыт. Тувыл махум тәнки люль вәрёгыт, өлнэ коланыл пөхыт хультуптым машинат торас вәрёгыт. Түйт ёмашакв хот-виңкве тәнки ат мыгыт.

Кұщай нэ садикыт үнттын вәрмалы урыл ос потыртас. Ань Нижневартоск үст сав няврамыт садикн ат ялантэгыт. Ты тал тот нила садик тах үнттаве. Мәнполь этпос 6 щисла Нижневартоск үс янытлан хөталыг олы.

Та хөталёт акв йильпи садик рүпитаңкве тах өвылтахты.

Кұщай нэ лавнётэ щирыл, тән касың тал үс янытлан хөтал кастыл акв йильпи садик үнттуңкве аствлэгыт. Тамле яныг мүйлупса тән үст өлнэ махум магсыл вәрёгыт. Тувыл ань үст сав няврам самын паты, тән магсыланыл кұщаит йильпи садикыт үнттуңкве ос ат алымёгыт.

Нижневартоск үст өлнэ мир машинат яласан лёңхыт урыл пищма акваг хансыглэгыт. Касың тал хунь түйт толы, лёңхыт пуссын люлиг варавет. Ань ты рүпата вәрнэ магсыл үс миркол сав олн тасты. Туи мälттым хөталыт үс лёңхыт ёмашакв щёпитаңкве тах патавет.

Людмила АЛГАДЬЕВА

Тан эрнэ тэлэ урыл потыртасыт

Округ Думат ос правительстват рӯпитан хөтпат сапрәнин акван-атхатыгласыт. Тыт өлнэ махум нуса ул вос тотэгыт, ёмашакв элалъ вос өлэгыт, рӯпата тал ул вос хультегыт, кӯщайт пуссын аквьёт анъ ты урыл номсахтегыт.

Округ правительстват рӯпитан хөтпат мирн нётнэ программа хассыт. Касың элумхолас таве интернетыт ловиньтаңкве ос матыр латың тув кетуңкв верми. Анъ комиссия вәрвес, тот 20 хөтпат рӯпиты. Тан округ янытыл мирн кетым латңыт ловиньтаңкве патыяныл. Махум латңаныл ты

программан ке артмөгыт, ос тув хансавет.

Сапрәнит депутаты танки номтаныл урыл ос потыртасыт. Борис Хохряков лавыс, рӯпата тал өлнэ махум анъ савсыр ханищтапыл вос щепитавет. Мот профессиян тот восханищтавет. «Югорский капитал» намп олның нэпак өщнэ щемьят ты тал олна-

ныл акв лөмтэ тувыл виңкве вос тартавет. Ты олныл туп рӯпата тал өлнэ щанит-ащит мивет. Акв щемья хурмит нявраме магсыл 117 сөтыра солковил анъ ойтавет. Тамле олныл тан кол өвтнэ, няврам ханищтан магсыл ойтхатуңкве манос щане пенсиятэ магсыл пинуңкве вермөгыт.

Мот депутаты танки номтаныл урыл ос потыртасыт. Анъ ты программан ос тан таи хансуңкве таңхөгыт. Правительстват рӯпитан махум рӯпата олнаныл ты тал нөх ул

вос нөтавет. Ос яныг кӯщайт танки рӯпатаныл магсыл сака тының пасаныт, уласыт, компьютерыт ос мот пормасыт ул вос өвтэгыт. Ос бюджетный организациятт рӯпитан махум тал сис акв щес 5% савитыг олнаныл вос нөх-нөтавет.

Ты коньпал кӯщайт савсыр мот тэлэ урыл потыртасыт, эрнэ вәрмалит пуссын ты яныг программан тах хансавет.

Людмила
ТАСМАНОВА

Сав няврамың щемьят ма-лөмтыл мивет

Ты этпос 19 хөталэт округ мирн пәриим саккон хаснэ махум сапрәнияныл өлыс. Ты тал тан өвыл щес атхатыгласыт.

Район ос яныг ўсыт кӯщайт анъ мот щирыл пәрияңкв патавет. Тан районный манос городской дума депутаты тыныл пәриявет. Манос конкурс щирыл хөтпа кӯщайт тув ўнттаве. Ты саккон 2015 тал маңьполь этпос 7 хөталныл рӯпитаңкв паты.

Анъ няврам өщнэ щемьят урыл саккон тамле йильпи латңыл хасвес – аквты щемьят тан яныг нявраманыл 18 талэ ат те төвлыс манос тав хөт элалъ те ханищтахты, тав ос 23 талэ иң ат төвлыс те, тонт садикын ялантан титыт манос хурмит маңь няврам магыс ойтым олн «компенсация» ювле миве.

Щанит-ащит садик магыс ойтхатнэ олн ат те өныщөгыт, тан «материнский капи-

тал» намп олның нэпакныл мощ олн виңкв вермөгыт.

Танти янасыг рӯпитан хөтпат, руш латңыл тан «индивидуальный предприниматель» лававет, анъ ёмашакв рӯпитаңкв вос вәрмысыт, тан магсыланыл тамле саккон хасвес – тан рӯпитаңкв ушты өвылтахтасыт те, налог-олн тананылн ойтуңкв шар ат эри. Ос тан акв тал сис 50 арыгтем хөтпа танти палтыланыл рӯпитаңкв висаныл те, тонт тан налог-олныл пинавет.

Анъ хурум манос тыгыл савнув няврам өщнэ щемьят кол ўнттын магыс ма-лөмтыл мивет. Ты саккон 2015 тал яныгполь этпос 1 хөталэ мус рӯпитас, анъ тав элалъ пирмайтавес.

Ушты сав няврамыңыг өмтум щемьят тан пуссын очередин хансавет. Ос та сакконт тох хансым өлы – өлнэ колыл иң ат ўнттым ма тыналаңкве шар ат рөви.

Ты тал Победа хөталув 70 талэ төвлы. Ты кастыл округ Думат рӯпитан маңьлат махум акв йильпи саккон хассыт, анъ ты Дума өлум порат тав пирмайтавес. Ты саккон «Знамя Победы» урыл хансым өлы. Анъ Победа хөталув мус «Знамя Победы» савсыр мат тагатаве. Мирколыт пуссын колаланыл Россия флаг, округ флаг ос ты «Знамя Победы» намп флаг вос тагатаве. Махум танти өлнэ коланыл ты флаг тагатаңкв ос вермөгыт.

Анъ маңьлат махманув вина ос пивосур пентсыл акв люль вит аюңкв патсыт, руш латңыл тав «энергети-

кыг» лававе. Ты айнэ вит тер маңь пәнка тыналаве. Хөтпа акв-тит тамле маңь пәнкарищ юв те аи, тав сав ёрыл ёхтаве, ўлме пөхан мины. Ты «энергетикыт» люль утыл пинавет. Хөтпа матах пәнка аи, тав давлениятэ сака нөх-мины. Тох хурмах-нилах пәнка аим маңьлат пыгыт тәра атимыг өмтөгыт, тан пуңканыл тиврыт өлнэ телп тәрсаныл маныгтахтөгыт.

Ты люль энергетик-вит сав мот мат хосат ат тыналаве. Округув янытыл ты тув порат лүпта этпос өвыл хөталныл тыналаңкв ат патаве. Ты саккон молодёжный парламентыт рӯпитан маңьлат махум тан хассаныл, округ Дума депутаты ты тав пирмайтавес.

Валентина
БАСИЛЬЕВА

Хальүс миркол күщайг Хулюмсүнт павылн ёхталасыг



Хальүс район тармыл өлнэ күщай ху-
мыг Владимир Иванович Фомин ос Сер-
гей Владиславович Кравченко Хулюмсүнт
ёхталасыг. Тэн павлың рүпата мат мус ялсыг,
мәхум ёт сапрәни вәрыгласыг. Хулюмсүнт
йигмән сыс Светлый руц павылн хөйгласыг,
Няхшамволь павылн ялсыг.

Владимир Ивано-
вич тав потыр өвылтас,
ләвыс, **Светлыйт храм**
пүсвес. Тот рүпитан ба-
тющка - Украинаныл
оам ойка, храм коны-
пал такви «тэквандо»
касылн ныврамыт ха-
нищтыяна, павлың мах-
мытн янытлаве.

Рётың юсвой этпост
Ягрим павылт 6 тал
арыг үнттын «Айс-
берг» кол астава, уцты
рүпитаңкв паты. Хальүс
районт ань тыг мус
маныр үнттын щырыл
өлыс, та рүпатат пус-
сын аставет. Округ
губернаторув Наталья
Комарова Хальүс ёр ма
үргалым ос уральтым
өныщитэ.

Ос акв яныг проект
өлы – кёрлөңх нупыл
яласан лёңх вәруңкв
патаве. **Ягрим ос При-
обье** хал туи яласан
лёңхыл вәраве. **Ягри-
мыг – Саранпавлыг**
хал ос лёңхыл пинаве,
Нёрытнупыл лёңхпаты.
Кит тал сыс лёңхыг
астлавөг. Владимир
Иванович лавыс: «Ты
яласан лёңхыг вәруңкв
патавөг, Хальүс рай-
он ёмшаквнувөг,
күпнитнувөг олуңкв
паты. Ма лёңх макыг
эри.»

Манах талыг ёмтыс,
нас та ләвөгыт –
Хулюмсүнт павылт
йильпи школа үнттаве.
Ань ты хөтал мус школа
үнттын мат няр вөңхат,
туп няр тарыгпыгыт
ос хаслы осэ хот-
няртасым өлы. Сергей
Владиславович ты урыл
тох лавыс: «Нэпакыт
щырыл ты тал холнэ
порат, школа астын
щырыл өлыс. Мөлты
тал школа үнттуңкв
вуйхатыглам күщай
рүпататэ ат вәрыстэ,
ань мөт пуңктөтап
кинсөв. Ты магыс йиль-
пи школа 2016 тал
холнэ порат уцта
асты.»

Ань өлнэ школав
сака ащирмаң, кивре-
конытэ йильпииг
эрттам вәрвес, уцпыл
ащирмаг патыс. Ты
урыл күщайт янас

кисхатуңкв лавсыт.

Садик ос шар пёсыг
ёмтыс. Мәхум киты-
глахтасыт: йильпи са-
дик үнттуңкв патаве
ман ати? Сергей Вла-
диславович тох ювле
лавыс: «Йильпи садик
үнттын магыс сака сав
олн эри, ты урыл по-
тыр иң атим өлыс. Ань
өлнэ садик иң өлнэ кём,
хоты кол щёпитаңкв
эри – йильпииг щё-
питыянүв.»

Өлнэ колыт үнттуңкв
патавет ман ати, ты
урыл павлың мәхум ос
китыглахтасыт. Оль-
га Васильевна Барано-
ва, Хулюмсүнт ми-
ркол күщай нэ, лавыс:
«Нэпакыт щырыл акв
өлнэ кол үнттын щы-
рыл өлыс.» Элалы
Владимир Ивано-
вич Фомин потыртас,
тав лавыс: «Светлый
павылт тахурип школа
үнттувес, ман мөл-
хөтал тув шалтсасүв,
щәгтым тувыл кон-
квәлсүв. Няхшамвөлт
сав щөмья өлнэ щы-
рыл кит кол үнттавөг.
Акв колэ өлнэ палаг ты-
гыл ты паты, мөтанэ иң
сав рүпата өныщи. Тох
рүпитан мәхум акв-
тох тыг вөвуңкв рөви.
Няхшамвөлын шар
тәрвитың матыр кол
үнттын пормас то-
туңкв. Матыр вәрнэ
сым-олн ке өныщөгын,

тот кол үнттуңкв ос
рүпитаңкв рөви.»

Мөлты тал пәсныл
Хулюмсүнт павылт
бассейн вәруңкв лә-
вөгыт: Газпром ор-
ганизация ос Хальүс
миркол акван-нётха-
тым, акв ёрыл ты
тал яныг пувлын кол
үнттуңкв өвылтыяныл.

Сапрәни өлум порат
Сосьвинское ЛПУ МГ
күщай хум Алексей Пе-
трович Коняев ос өлыс.
Ты йильпи ёхтум хум
уц күщайг патыс, тав
ләвыс: «ЛПУ павыл өлнэ
кол үнттуңкв ат па-
таве. Сав хөтпа өлы,
хоты пенсиян патөгыт,
өлнэ сәманылн ми-
ныглөгыт, өлум кола-
ныл ювле ат мыганыл.
Таймагыс өлнэ кол ат
төвылхаты. Ты урыл
пөх элумхөлас рүпата-
н сака ат выгүв. Павлың
хөтпат хотьют рүпата
кинсы, нэпаканыл ак-
ван-атим өныщиянүв,
пёрьяхтэв, хөңха әртми
– рүпатаңкв выглүв.
Төват номсөгыт – ам
тыт өлөгум, аном рүпа-
тан вуелын. Ха-
нищтахтэн, наңкинән
суссылтэн. Мәньлат
мәхум эрнэ обра-
зование ке өныщө-
гыт – маныр рүпатаңкв
ат виңкв.»

Сапрәни холам по-
рат Владимир Ивано-
вич Фомин тох лавыс:
«2014 тал сыс Хальүс
районт 102 ныврам са-
мын патыс. Сав ман
моща, ман өлэв,
яныгмөв. Посың ном-
тыл ос пустагыл
пуссын өлән, савсыр
конкурсат әралах-
тэн.»

Тох ты потыр
өлыс.

Анна
АЛГАДЬЕВА



КҮЩАИТ РҮПАТАНЫЛ

Рүпата колыт акваг уральтавет

Ты этпост ляххал тотнэ хөтпат махум рүпитан мананылт тәрвитың вәрмалит тара-паттын кұщай Евгений Кривобоков ёт акван-хөнтхатыгласыт. Тав савсыр тэлат урыл китыглавес.

Ойка ювле лавыс, вати хөтал этпос он-толовхуйплов щислат тән рүпитан коланыл хус тэлэ төвлыс. Та сьс тән 57 сөтыра савсыр тэлат уральтасыт, ос ты хосыт миллион савиткем элумхоласыт 6,3 миллиард савит хот-түйтум олнаныл ювле-ойтсаныл.

Хус тэл сьс ты инспекция колт рүпитан хөтпат штраф пув-нэ щирыл 132 миллион солкөви сэлсыт. 2014 тэлт тән 3 сөтыра 802 рүпитан ма уральтасыт. Тот лов арыгкем сөтыра сыресыр

люль вәрмалит хөнтсыт. Савыңпалэ-тыи колыт үнттын мат, транспорт ос связь рүпитан матт ос ма-вөй нөх-винэ мат өлэгыт. Төва махмыт щар мощ-ща олн сэлэгыт манос арыгнув сав щёс рүпитаңкве лававет, ос олныл ат ойтавет.

Мөт мат махум матахмат этпос рүпата олныл ат мивет. Ань тамле люль накыт тот воссыг ул вос ёмталасыт, та предприятие кұщайт акваг уральтавет. Тот рүпитан махум олныл ойтнэ магыс кұщайт сартын ат-

хуйплов хөталыл мивет. Тән тэланыл сака люльсаң ке минэгыт, хұрум этпосыл элаль ловиньтавет. Та юипалт нэматыр ат ке вәрэгыт, та кұщайт рүпатаныл округ Правительството, Дума ос прокуратура палыл уральтавет ос люль вәрнэныл магыс яныг штраф-олныл пинавет.

Тувыл төва рүпитан организацият элумхолас үргалан ос пустэгыл өлнэ наканыл щар ат сунсавет. Та хосыт матахмат хөтпат нас-кәссыг порсысыт. Тох хус тэл сьс кит сөтыра арыгкем хөтпа рүпатанылт атимыг ёмтсыт. Ты овылн патум накыт уральтым юипалт тара-патыс - 40 хөтпа тәнки люльсаң рүпитамааныл магыс

хотталь щалтмыт.

Та 2014 тэл сьс 34 тамле тәрвитың вәрмаль олыглас. Ты хөтпат пуссын пильщмаң мат рүпитасыт, сәтхуйплов хөтпа порсыс. Тән щёмьяныл олныл нётвёсыт. Мөт хөтпат хоса пусмалтавёсыт. Тән олныл нётуңкве ос лаввёсыт.

Округ янытыл олыг-лам тэлат пуссын Москва үс палыл ос акваг уральтавет. Инспекция труда кәсың сәт сьс тув латың кёты. Та щирыл люль вәрнэ кұщайт мощ хурахлым өлэгыт, нәмхотталь мөт мән ат оёгыт. Рүпата коланыл лап ул вос пантвёсыт, тән махумн тара олн ойтэгыт.

**Тамара
САКВЪЯНЫЛ**

Йис накыт ос пёс колыт нэпакн хансавет

Культура тармыл рүпитан махум «Торум Маа» намба музейт акван-атыглавёсыт. Тот Андрей Кондрашёв, округ культура тэлат үргалан кұщай хум, 2014 тэл сьс тәнки вәрум рүпатаныл овылтыт латың лавыс.

Ань округув янытыл культура палыл нэпакн хансым 5 сөтыра 360 йис вәрмалит, колыт манос йис мат үргалавет: 983 пёс ма ман колыт Россияв янытыл үргалавет, 110 пёс накыт округ историян хасвёсыт, тән районыт манос үсыт щирыл намылпинвёсыт. Косвыглүв, Сургутский районт «Барсова гора» олы, ос Ханты-Мансийск үст - «Самаровский чугас».

2014 тэл сьс 59 савсыр пёс накыт ос йис порат олым мат тара-паттувёсыт ос нэпакн хасвёсыт. Ты элы-палт хансым 11 пёс

вәрмалит хот-щуртумтавёсыт. Ул нэматыр пёс нак манос йис вәрмалит тот ат хөнтвес. Тувыл соссаң мир ат ялпың мананыл тарапаттувёсыт, тән та мат йис тагыл үргалыяныл.

Белоярский районт Нумто түр ялпыңыг лававе. Ань пөх хөтпатн тав щар ул вос новвес, ма-вөй хилнэ хөтпатн матэ пулиг ул вос сакватавес, тав государствав палыл «культурный наследие» намба нэпакн ос вос хансаве. Ты вәрмалит тэлаг вәрнэ магыс та түр ляпат өлнэ матумпала хантыт ос



ёрныт ёт тән хоса по-тыртасыт.

Октябрьский район Шеркалы павылт пёс порат үнттым кол «Усадьба купцов Новицких» (ты кол хурит пёслым олы.) ос Хальүст «Старое кладбище Берёзово» реестр-нэпакн хансуңкве ос хосат номсавег. Таимагыс ань ты урыл хансым савсыр потрыт ос пёс йист олыглам накыт кинсавет.

Андрей Кондрашёв лавме щирыл, тән сав рүпата оныщегыт.

Тот хұрумхуйплов элумхолас рүпиты. Тән халанылт историкыт, археологыт, этнологыт өлэгыт. Тувыл округ музейт рүпитан хөтпатн ос нётавет, научный потрыт ос нэпакыт аквёг хансэгыт.

Тастым олныт тән пуссын ёмас тэлан холтыяныл. Мөлты тэлт тән 616 сөтыра солкөвил майлувёсыт. Тән пёс йис мат тара-паттын магыс ос тот рүпитамааныл сьс 528 сөтыра солкөви холтсыт.

Туп акв ялпың мән тән акв маньщи ойкан ат тәртавет, тав йис тагыл Най-Отыр матэ такви үргалытэ, тармыл патытэ.

**Тамара
МЕРОВА**

ХАНИЩАП

Мә янытыл щань латңыт янытлан хотал олыс

Рус латңыл лавнэ "тотальный диктант" Россия янытыл овыл щес 2004 талт вэрыглавес. Тав такви девиз оныщи: «Мәк номтыңыг латңыт хансуңкве – ёмас тэлаг олы». Ту-выл соль, касың тал диктант-потыр хансуңкве, савнув махум ёхталаңкве патсыт. Тан пуссын танки номтаныл арталыяныл ос таимăгыс ханищтахтэгыт.



Юи-о-выл талытыт диктант рётың юсвой этпос 21 щислат, щань латңыт янытлан хоталт, вэрыглаве.

Ты талт мән округт маныщи, ханты ос ёрн латңыл хаснэ акв тамле тэла вэруңкве номылматвес. Тав Ас-угорский махум институтт рупитан хотпатн щёпитавес. Ос округ образования тармыл рупитан институтт школат диктант хансуңкве ос лавсаныл.

Та щирыл округ янытыл ват нупыл нила мат сосаңлатңыл махум диктант хассыт. Хальўс районт - тьи Кульпаст, Саранпавылт ос Хальўст кит янас мат махум атыгла-вёсыт. Белоярский районт - тьи Ванзеватыт, Касумт, Полноватыт ос Белоярский. Сургутский районт - махум Лянтор ўст, Русскинская ос Угут павлыгт диктант хансуңкве вёвыглавёсыт. Нижневартовский район-ныт туп павлың мат ёлнэ махум акван-атыглавёсыт: Варьёган, Корлики, Ларьяк ос Чехломей. Октябрь-

ский районт - Няри-хумит Лўи павылт; ос Кондинский районт - Шугурт, Ханты-Мансийский районт Кышикт диктант вэрыглавес. Яныг ўсың мат Сургутыт, Ханты-Мансийскат, Няганьт ос Урайт ёлнэ сосаң махум вёвыглавёсыт.

Институтт рупитан хотпат Еремей Данилович Айпин хансум потыр-охсатэ «Мә сые хўнтлэгу» маныщи, ханты ос ёрн латңытн толмашласаныл. Ёрн латңын потыр А.В. Филатован толмашлавес.

Ханты махум ты потыр танки ёлнэ ёранылт потыртан латңа-ныл щирыл толмаш-ласаныл. Ваховский диалектыл М.А. Праси-нан хасвес, среднеоб-ской - Л.В. Кашлатован ос сургутский - А.Н. Волкован. Тувыл ка-зымский диалектын потыр В.Н. Соловар толмашластэ ос йильпи графика щирыл хансыстэ. Ос аквты потыр Ф.М. Лельхова пёс ёщнэ гра-фикал хансыстэ. Ань ханты махум хоты ху-рип графикал хан-суңкве патэгыт, танки вос пёриёгыт.

Маныщи латңын по-тыр С.С. Динисламо-ва толмашластэ. Ань Ханты-Мансийскат ват нупыл акв маныщи элумхóлас диктант хансуңкве ёхталасыт. Савыңпалэ педагоги-



С.А. Герасимова ос Л.Н. Панченко



Т.Д. Слинкина ос С.А. Собянина

ческий колледжит ханищтахтан агит олсыт, тувыл кит институтыгт рупитан нэ, ос акв нэ "Лылың сёюм" студия-ныл ос ам ёлсў.

Ёвлэт махум ёлы-палт Светлана Гера-симова, Ас-угорский институтт научный со-трудникиг рупитан нэ, ты ханищтап урыл пуссын ёрнэ тэлат хўлтыс. Тувыл хаснэ потрув элалы Людмила Николаевна Хозумован (Панченко) ловиньта-вес ос мән тав юи-палэт пуссын хассў.

Ханты махум кит янас колнакыгт акван-атыглавёсыт. Касум махум диалектыл по-тыр Ирина Макси-мовна Молданова ло-виньтастэ. Тот хот-

хуйлов ханты махум олсыт. Ос сургутский диалектыл потыр На-талья Андреевна Ачина ловиньтастэ, тот нила хотпа хансыс.

Ань касың хотпа хумус пасре хансыстэ, ётылнув такви тэра-паттуңкве вёрми. Таи-мăгыс институтт ищхй-пың лёпсёт кисха-туңкве эри, тув такви майлам «шрифт-код» вос хўлтытэ. Комисси-ят ёлнэ махум ань рупатат пуссын ураль-тыяныл. Округ янытыл мирнхансымдиктантыт пуссынты институтн тах кётавет.

СОССАҢ МИР ПЁС НАКЫТ ЯНЫТЛАН ТЉЛ

Акань вярнэ нэ



Хурит ханты нэ Виктория Викторовна Карчина пёслым олы. Тав Лянтор ўст «Лянторский центр прикладного творчества и ремесел» колт художник-конструкторыг рўптиты. Округ янытыл манос элы хон мат выставкат ос мот савсыр хонтхатыглапыт олыгланэныл порат Виктория Викторовна тув акваг вөвиньталаве, мирн такви рўпататэ суссылтытэ (рущ щирыл мастер-классыг лававе). Сургут ўст «Старый Сургут» нампа колт тав хотаң совыл акань вярис, ты рўпататэ суссылтастэ. Тав лавнэтэ щирыл, тамле аканит Лям я ватат олнэ ханты махум тан тох юнтэгыт, мащтырлэгыт. Тав вәрум аканянтыл махум маттем та пүмшалахтасыт.

Светлана ХОЗУМОВА

Тав ўльпа тәрыл пормас вәри



Ты хурит ханты нэ Фёкла Семёновна Бондаренко пёслым олы. Ювле хультум тал ват саграпнал этпосэт Сургут ўсн ялмум порат таве «Старый Сургут» нампа культура колт кәсаласлум, пёслыслум, мощ потрамасмән. Нан ань Фёкла Семёновна потре ловиньтэлын.

– Ам Нижневартовский район Аган павылт олэгум, тот самын патсум, яныгмасум. Тыт, Сургут ўст, агим олы, хұрум нйврам оньши. Атам Аган павылт хум, омам ос Касум ерныл олыс. Казымский восстание олме порат омам колтагланыл Аган нупыл ояс. Атам ёт тән тот ты акван-хонтхатсыг.

Тыг ань ос рўпатам суссылтан магыс вөввесум. Ань мүй махум вос сунсэгыт, соссаң мир пёс порат ўльпа тәрыл маныр вәрсит, мащтырласыт. Ам ань суссылтэгум, хусапсов хумус сагаве. Овлёт ман ўльпа тәр атэв, ёмашакв щёпитыя-нұв, тувыл ущ матыр вәрэв, мащтырлэв. Элнаң махманув ўльпа тәрыл савсыр хусапсовыт коньпал норыт акван-нэгсалан магыс квәлыг вәрсит, сагсыт. Тамле тәр кол ўнттын порат ман мот тәрвитың рўпата вярнэ порат сака яныг пәрыс тотыс.

Ам Фёкла Семёновна китыгласлум, ўльпа тәр щёпитаңкве тәрвитың? Тав лавнэтэ щирыл, атхунь тәрвитың, щёпитан порат сака рўпатаң. Тув сав ёр пинуңкве эри. Ос ты рўпата



сака пұмыш. Хунь вярнэ тәлан матарыг ёмты, татем щәгтэгын, ос матыр вәруңкве тахмаёгын.

Аган павылт соссаң махум хұл алышлан ос вөраян пормасаныл вярнэ ос ошнэ кол олы. Фёкла Семёновна тот кұщаиг рўптиты. Такви павлэт тав намың-суиң хотпаг олы. Тамле намытыл майвес: Народный мастер России, заслуженный деятель культуры ХМАО-Югры, Почётный гражданин Нижневартовского района, п. Аган Нижневартовского района.

Ты сака ёмас, мұтраң эква, хотпа нупыл сымың элумхолас. Ты ятил хотпа пустәгыл вос олы, Най-Отыранән вос ўргалаве! Пус кат, пус лагыл!

Светлана РОМБАНДЕЕВА

ПАВЛЫҢ МИР ӨЛУПСА

Тэрпи лүпта ос тәнүт-пормас тастын хөтпат

Молты тал ват сәграпнал саквалан этпост округув янытыл тәнки рүпата вәрнэ хөтпат Ханты-Мансийск үсн тыналахтүңкевэ ёхталасыт. Ты тәла кәсың тал щёпитәлаве. Тот кәтыл вәрим пормасыт, сәвсыр хұлыт, пилыт, лахсыт ос вөрүй совыт тыналавет.

Тув ёхталан мир округувт вәрнэ тәнүт-тыт әрталаңкевэ вөрмёгыт. Хотьют кәсащи, такви магыслә матыр ёвтуңкевэ вөрми. Округувт манхурип тәнүт-пормас вәраве, мир вос вәганыл, таимәгыс тамле вәрмалы ты щёпитәлаве.

Тонт ты тыналахтан вәрмалын акв маньщи хум ёхталас. Ты Пётр Павлович Монин, тав «Правдинск» нампa соссаң махум община кұшаиг олы. Ты община 2005 тәлт рүпитаңкевэ овылтахтас. Тан Ханты-Мансийский район Горноправдинск павылт рүпитәгыт. Ам Пётр Павлович такви вәрнэ рүпататә урыл китыгласлум. Нән тав потре элалы лoвиньтәлбін:

«Мән общинавт

хұрум хөтпа рүпитәв. Мән пыгмёнтыл ос акв ханты хум. Община пұнсым пәсныл акваг тыг тыналахтүңкевэ ёхталәв. Маныр тәнүт-пормас щёпитәв, мощшaл-мощшaл тыг тотыгыланүв. Махум ат ке ёвтәгыт, сәкати сунсыяныл, эрың, ётылнүв хотьютн матыр эрмыглы. Пилыт, лахсыт, ұлыпа пәквсамыт, маныр вөрт яныгми, пуссын тәстәв. Атум утанув тәнүтыг ат вәриянүв, нас пөльтяныүв ос тыналыяныүв. Махум ёмас ёвтәгыт.

Тувыл ос пыгмён ёт вөраимён. Община нупыл хансым йис ма оныщимён. Тот кёрнялил нёхыс, охсар, ләпак пувимён. Янгуй магыс лицензиянәпак выгмён ке, нёвиль кәтын-паттымён.



Таквсы порат тот сүйпил лүпта атымён. Сүйпил ос сүйпил лүптат сәв агм пусмалтәгыт. Ты лүптат тўяг атавет, лёккарыт ос махум ләвнёныл щирыл, тән сәв эрнэ витамин оныщёгыт. Лүимат оlnэ махум ты пил ос лүптат пусмалтахтын магыс акваг атыгласыт. Тыил элумхёлас сәңкв-ахвтас, сёрыг агм, сым агм, пөльтахтын агм ос мот сыресыр агм пусмалтас. Ты пил нярыг тәнэ порат ос сәв пөрт тоты. Сүйпил хоса оныщүңкевэ рөви, лёлиг ат ёмты.

Тувыл хәльийив сәв атәв. Соссаң махум тыил кәт-ләгыл лувнакыт, майт, сёрыг ос инфекция агм пусмалтасыт. Хәльийив сәвныл

вәрнэ вит кәлп сыс-тамты ос хум хөтпатныг ёр мыг. Ойка тамле тэрпи айнәтә юипәлт экватә сака эруптаңкевэ патытә. Ты сака ёмас тэрпи, туп пусмалтан вәрмалы тоты. Таве ос тўяг атаве».

Ты коньпал ты общинат рүпитан хөтпат сәвсыр хұл алыщлэгыт. Пүвум хұланыл солвалтыяныл, посымыл посымтыяныл ос пөлямыг тыналыяныл. Сәвыңпәлэ ты хосыт оln сәлэгыт. Тән ура-ныл тох ләвүңкевэ рөви: тән мир магыс эрнэ тэрпи ос тәнүт-пормас щёпитәгыт. Ты вәрмалы щирыл рүпатаныл элалы акваг ёмщакв вос мины.

Николай МЕРОВ



СОССАҢ МИР ПЁС НАКЫТ ЯНЫТЛАН ТАЛ

Кāсың хумн эрнэ энтап



Т.А. Молданова

Рётың юсвой этпос котиль хоталанэт Ханты-Мансийск үст өлнэ «Лылың сөюм» колт соссаң хум хөтпатн өщнэ энтап урыл потыр олыс. Та ханищтап ханты мир пёс йис олупса ханищтан нэ Татьяна Александровна Молданова вāрыглас.

Татьяна Александровна ханты, мāныщи ос ёрн хум хөтпатытн өщнэ энтап-квāлыг урыл потыртас. Учёныиг өлнэ нэ ойкатэнтыл хум хөтпа энтапыт ханищтым сāv тал рүпитасыг. Тав ойкатэ ос учёныиг олы, тав наме Тимофей Алексеевич Молданов. Тэн сас Белоярский район Касум пāвылныл өлэг.

Татьяна Александровна потре щирыл, мāн мāvн ань өщнэ энтапыт XV-XVI нотыт йис порат тотвёсыт. Ань пёс пāвыл каныт хилнэ мāхум хүлтэгыт, тән хөнтыглам энтапыт хораманыл щāлыг-олн ос āнох тёрныл вāрим олсыт. Ты тёрыг мā тиврыт сāv тал хүюңкв вёрмөг. Пёс порат оныщим энтапыт хораманыл мощ мөтсырнувөг олсыт. Тән та порат сāvсыр вөрүй хуритыл хорамтавёсыт. Та коньпал сыраяныл ос үнтуп ханнэ мā вāрим олыс.

Энтап-квāлгыт титпис сōвыл

юнтыглавёсыт. Та порат вāрим хорамыт сāvсырыг олсыт. Төват хотыл элы мāныл тыг тотыглавёсыт. Лүйи мāt соссаң мāхум тёр толтым танти хорамыт ос сōссыт. Ты ёрт тёр мощаг өлнэ мāгсыл, тёр пентсыл сāлы ос янгуй анытыл хорамыт яктувёсыт. Таимāгсыл ты тән сāvсырыг сусхатасыт.

Йис пораныл салың ос төва вōраян мāхум өщнэ энтапаныл ань ты мус ты ёхтысыт. Кāсың энтапың хум такви щирёт энтапе хорамтытэ. Акв хурип тит энтап ат хөнтэгын.

Ань өлнэ соссаң хум хөтпа халт төват энтап-квāлыг самын пыл ат вāщинтасыт. Салың ос вōраян хум энтапе тал рүпататэ элаль ат лакви. Энтаптахтын хум кāтыт өщнэ пормасанэ пуссын ляпат өлэгыт.

Татьяна Александровна потре āнумн сака мұстыс. Ты ёмас ханты нән сāv тал пустагыл олуңкв лāвөгум. Най-Отранән ёмщакв вос ўргалаве.

Александр ВЬЮТКИН

Тән пирмайтым сākкoныт урыл ляххал хансэгыт



Ляххал тотнэ мāхум мāгсыл округ Дума «Думать по-югорски» намба касыл вāрыглы. Тал сыс депутатыт манхурип рүпата вāрөгыт ос сапрāнит манхурип сākкoныт пирмайтэгыт, журналистыт ты урыл акваг хансэгыт.

Хансум потраныл ты

конкурсын кётыглыяныл. Тамле касыл таи мāгсыл вāрыглаве, тыт өлнэ мāхум депутатыт рүпатаныл ос йильпи сākкoныт урыл сāvнув вос вāгыт.

Ты этпос 18 хөталэт ляххал тотнэ мāхум акван-атыглавёсыт ос тән халанылт нōх-патум хөтпат янытлавёсыт. Борис Хохряков, округ Дума

кұшай, мāхумн лāвыс: «Кāсың тал сāv хөтпат ты касылн тәнки потраныл кётыглэгыт. Ты тал округ янытыл кётым яныгсат арыгкем сāvсыр потыр жури-хөтпат ловиньтасаныл ос нōх-патум хөтпат пёриясыт. Нән сака сāv ёмас потыр кётсын, тыи мāгсыл мāн кāсың номинацият нōх-патум кит хөтпа пёриясув».

Ты тал овыл места «Местное время» ос «Московский Комсомолец-Югра» намба газетаг вистән.

Китыт места «Югра» намба журналт рүпитан эква Ольга Пламадилова ос «Тюменские известия» газетат рүпитан хум Андрей Фатеев висыг.

Хүрмит местал Алексей Нейман, «Новости Югры» газетат рүпитан хум, ос Ольга Капанина, «Самотлор» намба телекомпаният рүпитан нэ, майвесыг.

Людмила ТЕТКИНА

Үй ұлыглан әргыт элаль тотавет



Хальұс культура Центр колт Раиса Петровна Загородняя рұпты. Ты ханты нэ пёс йис олупса вәрмалит ёмщакв вәганэ. Ам тув ялнэм порат тав ётэ хонтхатыгласум. Раиса Петровна «Үй йиквнэ» мāt сāv щёс олыглас, сāv пёс потыр ты урыл вāг.

Пёс мāхум Үй йиквнэ порат ялпың әргыт әргыгласыт. Ты әргыт маныр номт тотэгыт, тав ты урыл āнумн мош

потыртас. Маниг олмёт яныгмам пāвлёт Үй кāтын-паттум юи-пāлт мāхум тўлыглахтасыт. Тōва потрыт тав

щāняге - āщагёныл хўнтыглāлыс. Ань хумус ты вәрмалит номиянэ, тох потыртас. Нāн тав потре элаль ловиньтэлйн:

«Мāньщи ос ханты мāхманув мāгыс шар яныг ялпың хōтал - ты «Үй йиквнэ нак» олы. Ты ялпың хōтал вārнэ мāгыс, овлёт пупāщикве юил кояве, таквсы порат хōттавёлхуи, вōраян хōтпат та мā тāра-паттыяныл. Ётыл, тэлы порат тав мāколэн хум хōтпат ёхтэгыт, кāтын-паттуманыл юи-пāлт, тав пāвылн тотыяныл.

Үй йиквнэ мāн сāvсыр пāвлытныл рўтыңыщ олнэ мāхум мўйлуңкве акван-

атхатыглэгыт. Хўрмах, атах манос сāтах хōтал Үй йикваве. Ты ялпың хōталытн мāньлат мāхум ос ёхталэгыт. Тот тāн халанылт вāйхатэгыт, ётыл щāнитн-āщитн хāйтталавет. Тувыл ты вārмāлын Үй ұлыглан әрыг вāнэ яныгпāла хōтпат әргуңкве вōвыглавёсыт. Ты әргыт пёс йис пораныл элаль тотавет, тōват ань ты хōтал мусхулытсыт.

Тōва ялпың әргыт сака хоса әргавет ос туп хум хōтпат тāнаныл ёмщакв вāганыл. Ялпың әрыг әргын хōтпа маныр кāсалы, та урыл ос әрги. Үй колт тамле әргыт әргавет: хотыл ты Үй мāн ёхтыс,



Экват пўрлахтэгыт



хот тав катын-патту-вес, хунь юв тотвес, хумус щёпитавес, юв тұлвес ос хумус ялпың хотал овылтахтас.

Хум хотпат хорамыл юнтым кёнтыл, нуй сәхил, пәссал, нярал масхатёгыт, вильтаныл нуй тёр-ломтыл лап-пантыяныл. Кёнтыт тармыл павыл ўргалан Най-Отырыт хансаныл юнтым олэгыт. Пассат ос мот хансал юнтым олэгыт. Ты маснутыт туп Ый йиквнэ порат масыглавет, нас тох шар ат оныщавет.

Хум хотпа Ый ўлыглан эрыг овылтанэ порат, тав похат люльнэ хотпат тулёвлыл акван-пүвумтахтым пуңк пинэгыт ос катаныл нонхаль тотыгпалыяныл. Эрыг аква, хұрум манос тыгыл иң савнұв щёс эргаве. Учёный хотпат пёс порат ялпың эргыт хансым яласа-сыт. Ты урыл ань нэпакыт хансым олэгыт.

Ялпың эрыг щирыл, пупапщикве Төрүм пыгыг олыс. Акв мат овыл пыгыг, мот мат хұрмит пыгыг, хотты мат ос сатыт пыгыг лававе. Касың павылт соссаң махум танки щираныл ты урыл потыртасыт.

Пупапщикве овлэт Нуми Төрүмт олыс, ма нупыл ёлаль нас сунсыс. Нётнэ вөрың, тұрың, яң мат тав сымён татем хоясыт. Хоса ман вати сунсыс, Төрүм аще вөвуңкве патыстэ, таве ёл вос тартытэ. Аще ты кос таве ёл-тартуңкве ат таңхыстэ, ёты-овылт тартыстэ. Пыге ёл-тартнэ магыс апа юнтвес, тув унттувес ос ёл-тартуңкве та патвес. Лашал-лашал ма мус та ёхтыс. Нумын тав ном-сыс, ма састумыг олы. Ма тармыл ваглыс, насати тав урамыңыг, вонхаңыг оlnэтэ, карыс ййвыт халт тав

шар мәниг ёмтыс. Вос-сыг маныр вәруңкве, вөр янытыл ощатах-тым ёмыгтаңкве та патыс. Мощ ёмыгтас ос тәпъялаңкве тахмаяс. Сыресыр товлың уит, вөрүит кәсалас. Тән юи-пәланылт нәвла-лахтым ос хоттымат кит ләглыл ёмыгтан хаштәл ут палт нәглыс, ампарыт ос сүмъяхыт кәсалас. Акв ампар кйвырн ләщлакв вора-тас, тувыл тәнүт тұлмантас, вөрн тоты-стэ, ёмщакв тәпъялас. Тавән ты вәрмалъ сака мұстыс, ос тувыл тәнүт тұлмантаңкве та патыс. Махум номсэгыт, аман хотьют тәнүт тұлманты, ләгыл-паттаге элумхөлас хурипаг, самын ос ат ликмалы. Махум та тұлмах кинсуңкве пат-саныл.

Та сьс, пупапщикве сытамыг пәль вөр янытыл ёмыгтас. Акв мат тамле эрыгсов олы, тав ёри патум ййв ўлтта ваңкмётэ порат, няр сове пуныңыг ёмтыс. Овлэт тав ләгыл-паттаге ос кат-паттаге элумхөлас хурипаг олсыт, ётылнұв пунытавёсыт ос консыл яныгмавёсыт. Ватихал тәнүт тұлмантанэтэ магсыл, тав элумхөласн катын-паттуңкве ты патвес.

Пупапщикве катын-паттаге, сахитэ аңхаве, аваң тагыл юв тотаве. Махум ваганыл, тав Төрүм пыг, ййквнэ порат таимәгыс таве ўлыглан эргыт эргавет, тав исэ нонхаль вос мины. Ты ялпың хоталытн савсыр ма-ныл махум ёхталэгыт. Эргыт юи-пәлт тән павлың Най-Отырыт суссылтыяныл. Тән Төрүм пыг ёт тот акван-хонтхатэгыт, ак-вёёт савсыр тәла урыл потыртэгыт. Ты юи-пәлт ялпың хотал ём-щакв минуңкве паты.



Та хотпа, хотьют пупапщикве катын-паттыс, ава ляпат ўнлы, акваг ләви: «Ты ати ам наңын алас-лум». Тувыл хум хотпат оцхулиң тўлыглапыт вәруңкве та овылтахтэгыт. Тән ты вәрмалъ товлың уит манос вөрүит нупыл пёрыгтыяныл, эрттам тән ты пупапщикве катын-паттысаныл. Ый ййквнэ вәрмалъ этэ-хоталэ мины, махум ёл ат хуёгыт. Алпылыг ёмты, ос элаль тўлыглахтуңкве та овылтахтэгыт.

Ты тўлыглапыт элумхөлас оцмар вәр-нэ накыт мовиньта-вет. Манхурип оцмар, урк, эсыгхатан ос мори оlnэ нэ-хум хотпат олэгыт, ты тўлыглапыт хосыт суссылтаве ос пұмаш, оцхулиң ййквыт ййкжавет. Тўлыглапыт ёл-пой-тыглан сьс нэ хотпат эргыт эргёгыт.

Пёс пораныл ань ты хотал мус пупапщикве ялпың уиг ловиньта-ве. Яныг ўра Октябрь-ский районт Вежако-ры павыл похат олы. Пёс махум касың тәл Хальўс, Белоярский ос Октябрьский районы-ныл Ый ййквуңкве тув акван-атхатыглалсыт. Ты коныпал махум пуңк пинуңкве ос ййр тўштуңкве тув ялантәлсыт. Хумус пёс порат Ый ййквыглавес, ам вәнэм щирыл та

потыртасум.»

Ты сака яныг ялпың вәрмалъ, ты урыл хоса потыртаңкве рөви. Раиса Петровна ләвнэ-тэ щирыл, вәт нупыл ат тәлкем минам юи-пәлт Ый ййкв вәнэ хотпа сәв олыс. Ты накт ты вәрмалъ вәнэ хотпа сака мощща хультыс.

Та сьс, ялпың эргыт вәнэ хотпат иң олэгыт. Тән ань Ый ййквнэ накт ты эргёгыт. Ос мәнълат махум ты тәла нупыл ат сунсэгыт, эргыт ат ханищтыяныл. Советский Союз олум порат Ый ййквуңкве ат тартыглавес, махум сытамыг ййквыгласыт. Таимәгыс ань оlnэ махум ты урыл мощща вагыт. Мощёртын тох ёмты, Ый ўлыглан эргыт ләшал та ёрув-лавет.

Ос таи ёмас, учё-ный ос этнограф хотпанув Ый ййквнэ накт нэпакытн хан-суңкве алымасаныл. Пёс порат хумус ялпың эргыт эргыг-лавёсыт, хумус махум тўлыглахтасыт, ты тәлат пуссын ёл-хансым олэгыт. Ты хосыт хуньт эргыт ос тах квәлттапавет. Ань ос ты накт соссаң махманув ватихал Ый ййкв вәрыглэгыт. Са-кати мән ты тәла мощ элаль тотылўв.

ХАНИЩТАП

Половинка павылт рүпитан школа

Кондинский район Половинка
Кпавыл котилыт яныг кирпащ шко-
ла үнттым олы. Ты ханищтан кол 2005 талт
рүпитанкве овылтахтас. Аквпальерёт садик,
мөтпальерёт школа олы.

Күщаиг тот Елена Андреевна Рябова рүпиты. Половинка павылн ялмум порат ам таве нйврамыт ханищтан вярмалы урыл китыгласлум. Тав ювле таи лавыс:

– Школавт 170 агирищ-пыгрищ ханищтахты, садикын 46 нйврам яланты. 2010 талт павлувт школав ос садик акван-тотвесыг. Ханищтан кол күщаиг ам паттувёсум.

Ань овыл классын 19 нйврам яланты. Шар сав нйврам 6 классыт олы, тот 35 агирищ-пыгрищ ханищтахты. Ты яныг класс киттыг-уртыслүв, ань кит 6 класс оныщев. 11 классыт туп хурум нйврам ханищтахты. Мөт классын туп 8-11 нйврам яланты. Агит-пыгыт 9 класс асталгыт ос Урай үсн колледжин элалы ханищтахтункве минэгыт. Павлув Урай үст пөхат олы, алпыл автобусыл тув минэгыт, йтипалаг ювле эхтэгыт. Павлың махум ос тот рүпитэгыт, ос аквташирыл тыгле-тувле яласэгыт.

Ты тал английский латың ханищтан нэ школан рүпитанкве вөвыслүв. Овлэтос Урай үст олыс, касың хөтал үснлы тыг эхталас. Ань Половинка павлувт олнэ колыл майвес, тыг вантлас. Мән школавт ханищтахтам аги мөлты тал Югорский университет асталас. Ань ос тыт рүпиты, нйврамыт руц латңын

ханищтыянэ. Сав хөтпа Курган үснлы рүпитанкве тыг эхтысыт. Тыт олнэ колыл майвёсыт, школат сав олныл ойтавет. Ювле тәнки үсанылн минуңкве нэмхотыют ат кәсашы.

Школан ялантан нйврамыт халт 60 агирищ-пыгрищ мәнщииг олэгыт. Ты элы-палт щаняныл-ащаныл китыгласанүв, нйвраманыл мәнщи латың ванкве кәсашегыт ман ати. Щань латың ханищтанкве нэмхотыют ат тах-маяс.

Нйвраманув «История Югры» ос «География Югры» нампa предметыг ханищтэгыт. Ты урокыгт тән соссаң махум пёс олупсаныл, культураныл урыл потыртавет. Округув янытлан кас-тыл нйвраманув маг-сыл касыл вәрыглэв. Тән сәлы сүн ұлтта поргегыт, хайтыгтэгыт, тыныщан пахвтэгыт ос мөт щырыл касэгыт.



Павлувт олнэ музей ёт ос акваг рүпитэв. Ань Галина Анатольевна Мостовых музей күщаиг олы. Тот рүпитан хөтпат нйврамыт магсыл савсыр конкурсыт акваг вәрыглэгыт. Сакныл сагуңкве, сәс-ныл хусапыт вәруңкве ос мөт щырыл мащ-тырлаңкве ханищты-яныл. Нйвраманув тув ялантаңкве кәсашегыт. Тән «Ұринэква хөтал», хұл алыщлан хөтпат янытлан хөтал ос мөт ялпың хөталыт щөпиталыглэгыт. Агири-

щ и т - п ы г р и щ и т эргункве, йиквуңкве тув вөвыглыяныл.

Кәсың тал округ янытыл соссаң махум мәнхәпыл касуңкве Нефтеюганский районт акван-атхатыглэгыт. Хурум тал нйврамыт ханищтан хөтпанув ёт касуңкве тув ос ялантэгыт.

Махманув овыл щёс хунь тув ялсыт, мәнхәпыл яласаңкве ат вёрмысыт. Туп тув эхталанэныл магсыл янытлан нэпакыл майвёсыт. Тувыл мәнхәпыл товуңкве ханищтахтасыт, ань ати нас мүйлуңкве, мөт махум ёт касуңкве тув ялантэгыт. Мәнки мәнхәп ат оныщев, улпыл тыи магсыл овыл места виңкв ат вёрмев.

Мөлты тал тув ялсыт, лаввёсыт, махум пуссын аквхурип мәнхәпыл вәравет, эрың тонт тән тот нөхпатэгыт ос овыл места тах выгыт.



Половинка павыл школа

Людмила ТЕТКИНА

ПОБЕДА ХӨТАЛ КАСТЫЛ



Мирн вāнэ хөтпат ўсувт атыглавёсыт

«Най лылы» намба тина суссылтан фестиваль Ханты-Мансийск ўст хўрумхуйпловит щёс вāрыглавес. Ты тāl яныг хөнт минам пāsныл сātлов тāлыг ёмты. Та яныг хөнт урыл тина щирыл сāv суссылтаве.

Фестиваль өвыл хөталёт хөнтлам мāхум вўгыр лёңх хосыт ёмсыт. Тāн юи-пāланылт тинат пōслахтан, мирн вāнэ артист-мāхум «Югра-Классик» намба колн ущ шалтсыт. Ты фестиваль хөт хөтал минас. Ты урыл мōтыт газетат ловиньтән.

Александр АНЯМОВ

Өвыл яныг хөнт урыл нэпак нэглис

Рётың юсвой этпос хөтыт хөталёт Ханты-Мансийск ўст өлнэ государственный архив колт «Первая мировая война в жизни югорчан» намба йильпи нэпак мирн өвыл щёс суссылтавес.

Ты нэпак округ архив колт рўпитан мāхум ос Ханты-Мансийск ўс краеведыг өлнэ хум Владимир Филиппович Струсь акван-нётхатым щёпитасаныл. Округ архив колт кўщаиг рўпитан нэ Людмила Сажаева ты урыл тох потыртас: «Мāнавн Сергей Сергеевич Козлов нэпак тāратаңкв олныл нётыс. Тав Тюменский область Дума депутатыг өлы. Хум ат те нётыс, нэпак аты нэглис. Нэпак хаснэ мāгыс мāхум нёлолов

тāl рўпитасыт. Та тāлыт сыс Владимир Филиппович сāv рўпата вāрыс. Россия янытыл пёс порат хансым нэпакыт щирыл мāхум наманыл тинсым рўпитас. Округ янытыл та өвыл яныг хөнтыт пуссын аквёет акв сōтыра 870 хөтпа хөнтлыс».

Ты нэпак суссылтан кастыл Ханты-Мансийск ўст өлнэ яныгпāла мāхум тув вōвыглавёсыт. Та хөнтыт тāн āтяныл, өпаныл хөнтлысыт. Та мāхум халт сāv Пуртов, Сивков, Карандашов ос Корепанов хөтпат өлсыт. Тāн пуссын 1893–1916 тāлытыт хөнтласыт. Хум хөтпат тāl сыс акв щёс таквсы порат вуйлувёсыт. Та порат атпан нупыл титыт тāланыл тōвлын мус лусытасыт. Тāн наманыл Тобольск ўст архив колт пёс нэпакыт хансым өлэгыт. Тōват атпан арыгтем тāланыл мус лусытасыт.

Кўщай нэ юи-пāлт Ольга Поликарповна Ермолина такви āще Поликарп Матвеевич Спиридонов урыл мощ потыртаңкв вōввес.

Ольга Поликарповна āще «унтер-офицер» намыл маима мус лусытас. Юв ёхтумёт, тав нэмхуньт та урыл ат потыртāлыс. Лусытаме мāгсыл Поликарп Матвеевич наган намба мāнь писалил мўйлуптāлыс. Наган аквпальёрёт «За безупречную службу царю и Отечеству!» лātңыт хансым өлсыт. Ойка юв ёхтумёт мўйлуптāлым наганэ хот-тўйтме. Та урыл ам āтям нэмхотьютн атыпыл

потыртāлыс. Щёмьятэ мāгсыл тав сака пилыс. Та порат сāv мир нэмхотьютн ат вāнэ щирыл хотталы тотвёсыт. Ты нэпак мāгсыл ам нāнан яныг пўмащипа лāтың лāвёгум. Ты урыл ань яныгман нāврамытн потыртаңкв ёри. Тāн яныг өпаныл өлупса вос вāганыл ос элалы вос потыртыяныл».

Элалы Нина Никитична Отто āтятэ Никита Федорович Пермяков урыл мощ матыр потыртаңкв вōввес. Эква лāвыс: «Ам āтям ат номилум, та порат ам самын иң ат патсум, өлум накыт урыл āнумн омам потыртāлыс. Атям хөнтлуме порат пленын вўйлувес. Тўрманколт тэтал, аквписыг рāтым өщвёсыт. Тав ётэ лусытам мāхманэ урыл титыглавес. Юи-өвылт āтям тып йив нирыл вāt нупыл ат щёс сысёт сайттāl патнэ мус хосгувес. Рāтым мāхмытын тох тав та оссулавес. Тāнти тувыл элалы минаясыт.

Пāвлың мāхум āтям тāнти палтыланыл висаныл. Мощ пусмалтахтаме юи-пāлт тав такви өщнэ маснуканэ хот-тўйтсанэ. Мōт маснуктыл масхатым тох тав юв та ёхтыс».

Та порат өлум накыт, пёс мāхмытын потыртāлым потрыт пуссын нэпакн хансым өлэгыт. Ты йильпи нэпак пуссын аквёет хўрумсат савитыг тāратавес. Тāн пуссын округ янытыл библиотекат, ханищтахтын колыт щирыл тётает.

Александр ВЬЮТКИН



ХАНИЩАП

Агиквет-пыгквет пустагыл вос яныгмёгыт

Ягрим павылт «Росток» намба центр ылы. Тот тарвит олупсан патум махум нявраманыл нётавет. Кол 2001 талт пусвес. Тонт Николай Кисляченко Хальёс район кўщаиг ылыс, центр вярнэ магыс кол мис.

Ты центрыт ань хўрум отделеният вярвёсыт: тыи ханищтахтын агит-пыгыт ёт рўпитан стационар, агмың-мосың, саква-тахтам няврамыт ёт рўпитан кол ос нуса тотнэ щёмьятн нётнэ служба. Касың тамле колт янас хотпа кўщайлахты. Ань ханищтахтын агит-пыгыт палт кўщай ваңын нэ Светлана Вечкитова ос ты стационарт пуңкотнэ нэ Олеся Доля ёт вайхатыгласум. Тэн потрагён ань ловиньтэн.

Хумус ты тэлат овылтавёсыт

Ягрим павылт мирн нётнэ социальный тэлат мирколың хотпатн 1995 талныл овылтавёсыт. Тонт тән хўрум колнакың кол мисыт, махум тот рўпитаңкв та патсыт. Овыл кўщаиг тот Ольга Ивановна Чумакова ылыс, эква ань тыг мус няврамыт ёт рўпиты.

Та порат район кўщайтн тән сака ат нётвёсыт, тахолът павлың махум тананыл эрнэ пормасыт тотсыт, сыресыр эрнэ нётмил вярсыт.

Овлёт приютыт туп Ягримт олнэ агиришит-пыгришит олсыт, ётыл ты кол районный вярвес. Тув маң павлың няврамыт то-тыгланкве патвёсыт.

Саранпавыл элы мат ылы, тувыл махум тотнэ магыс мощ тарвитуңыг ылы: тэлы лёңхыл хоса минуңкве

ос товнакт сака аширмаң. Агмың-мосың хотпат молях вагтал патёгыт, товлыңхапыл яласаңкве билет сака тының, тән хотты хотпатн тув та тотавет.

Няврамыт урыл

Ты колыт аквторыг атхуйплов савиткем няврам пусмалтах-туңкве ос ўшлахтуңкве вёрми. Ань китхуйплов агирищ-пыгрищ тот ылыс. Нила няврам тув юил ёхталасыт ос тән хотал палыт тот ўшлахтасыт, мот нёлолов няврам этэ-хоталэ тот олэгыт.

Това няврамаквет тал-охса сыс тот олэгыт. Тән тот пусмалтавет, ханищтавет ос нас ўшлахтэгыт. Юил ёхталам агит-пыгыт хўрум этпос тув ялантэгыт. Тән щёмьянылт олупсаныл акв-тох люлиг ёмталы ке, тән «Росток» центрын ювле वोавет.

Центрын савыңпалэ няврамыт опека кол палыл кётавет, товнакт щань-ащит нётмил вовнэ магыс нявраманыл тув то-тыяныл. Мёлал акв нэ пўльницат хоса пусмалтавет, тав ат агиянэ-пыганэ центрыт хуль-туптэлсанэ.

Сартын сав хантыт ос маңышит тув атыглавёсыт, ань юи-овыл талытыт мот мир няврамыт тув ос то-тыгланкве патвёсыт. Няврамыт танки халанылт журтыңыщ олэгыт, матыр-ати воруңкве аквёет ханищтахтэгыт.



Ёмаспалнұпыл С.А. Вечкитова ұнлы

Сыресыр ханищтапыт урыл

Няврамаквет ёт тот ханищтан хотпат рўпитэгыт, тыи психологыт, педагогыт, савсыр агмыт пусмалтан лёккарыт. Тән тот матыр катыл мащтырланкве, хурит пёслуңкве, ййквуңкве, эргуңкве ханищтавет.

Тот олмум порат това агиришит-пыгришит ялпың хотал кастыл сыресыр хорамың утыт вярсыт, мотаныт эргыт ос ййквыт ханищтасыт. Акв колнакт пусмалтан эрнэ ут пуссын ылы. Няврамыт пусмалтахтуңкве ос ўшлахтуңкве тув щалтапалэгыт.

Тувыл тән танки олупсаныл ос олнэ мананыл ўргалан магыс савсыр ханищтапыл варавет. Тән Россия ма вос янытлыяныл, пустагыл вос яныгмёгыт ос ишхыпың утыл рўпитаңкве вос хасэгыт. Тамле тэлат няврамытн ос сака пўмщалавет.

Танки яныгман мананыл ос тыт олнэ сосаң махум пёс вярмалит, пёс накыт ванэ магыс янас программа щёпитым ылы. Тот «Сорни ёш» намба

студия вярвес, тән сакныл матыр маң хорамыт хартэгыт, лўима махум савсыр пормасыт урыл потыртэгыт ос хумус тананыл воруңкве эри - ханищтавет.

Центрыт сав тал Луиза Степановна Тихонова рўпиты, тав ты няврамыт ханищтыя-нэ. Тананыл «Ўринэква хоталн» тотыглыянэ, тот эргёгыт, ййквёгыт, ёнгилыт касэгыт.

Ты центрыт олнэ агит-пыгыт «Альянс» намба колн ялантан матумпала махум ёт хонтхатыг-лэгыт. Тән аквёет сыресыр кас вярёгыт, спектаклит щёпитэгыт, акван-нётхатым журтыңыщ олэгыт. Мот организацият та центрын ос ёхталэгыт, манос няврамыт танки палтаныл мўйлуңкве вовыглыяныл.

Тувыл няврамыт савсыр касылыт касэгыт ос ёмас тэланыл магыс мўйлупсал мивет. «Росток» колт олмумт, ам савсыр грамотат, благодарность-нэпакыт касаласанум. Таимагыс номтум сака ёмас, тот ёмас сымың хотпат рўпитэгыт.

Тамара МЕРОВА

Эргын-ййквнэ ханты махум

Сургутский район Лянтор үст «Пиңалы» Сханты латңыл (рущ щирыл ос «Пимочка») намп хантыйско-фольклорный этнографический эргын-ййквнэ ансамбль олы.

Кўщаиг тот ханты нэ Светлана Михайловна Сенгепова рўпиты. Ювле хультум тал мань таквс этпосэт тән эргынэныл-ййквнэныл лов тал ты тōвлыс. Ам Светлана Михайловна ёт хонтхатыгласум, ансамбляныл урыл таве китыгласум. Нан ань элаль тав потре ловиньтэлын.

– 2004 талт Лянтор үст няврамыт магыс «Салыкве» намп китыт окружной фестиваль олыс. Ты юи-палт ам кўцаитн вōввесум, лавегыт: «Усувт мань ань манти ансамбль ат оныщев. Манти оцну-

вув те, тай ёмас олнув. Наң ат вуйхатэгын? Эргын-ййквнэ махум вос хонтнувын, мань наын нётэв».

Тувыл аквта тал таквсы порат мань ййквуңкв, эргуңкв та патсув. Ам кўщаиг паттувесум. Ханты латңыл эргыт эргев, пес ййкванув ййквев. Лов тал сыс мань сав мат олсув, сав мат яласасув. Мань таквс этпост Коми республикан Сыктывкар усн ялсув, тот няврамыт магыс фестиваль олыс, тув вōвиньталвесув. Ам ётум ань мань агим эрги-ййкви. Ойкам манавн акваг нёты,



тōва тэлат тав варапьянэ. Ййквнэв порат хотьютув ёхтуңкве ат те верми, тав мань ётув ос люлюмталы ййквуңкве, койп ратункв эри те, койп раты.

– Светлана Михайловна, наң хоть самын патсын?

– Ам Пим я ватат самын патсум, тот яныгмасум. Аги опарищ намум Лемпина. Анёквагум-ашойкагум палт Лям я ватат ос акваг олыгласум. Ашойкам Семён Павлович Песиков. Салың-колың махум тот йис тагыл олэгыт, тан халанылт яныгмасум. Ойкам ос Касум палыл олы, Сергей Степанович Сенгепов. Ам Пим я хантыянув олупса ваглум, та халт яныгмасум, ту-

выл ойкам олупсатэ ос латңаныл ос ёмашакв ваглум. Мён ойкамёнтыл нила аги, акв пыг оныщимён.

Щанягум-ащагум салың-колың хотпаг олсбг, хул алыщласбг, вōраясыг. Нила увщи ос хўрум ягыг оныщегум. Мань ворт яныгмасув. Салы сав ошсув, маньтагыл пуссын салыл яласасув, посым пўт вāрсув. Тох та яныгмасув.

Светлана Михайловна потре магыс пўмаципа латың лавегум. Тав хотпа нупыл сымың нэ, мўтраң элумхолас. Щёмьятэ ёт пустагыл вос олы, сōтыңыщ, щуниңыщ вос олы.

**Светлана
РОМБАНДЕЕВА**

М҄ныщи пёс пормасыт суссылтавет

Рётыҥ юсвой ётпос титхуйплов хёталёт Ханты-Мансийск ёст ёлнэ «Торум Маа» колт «От экспедиции к экспозиции» нампайильпи выставка пёсвес. 1999 - 2003 т҄лыт сым҄ныщи ос хётал нёглын ёрт ёлнэ ханты м҄хум палт атым пёс йис пормасыт ань ты суссылтапт ёлсыт. Ты пормасыт м҄ныщи нёв Нина Петровна Чернякова, такви аҥи ёпарище наме щирыл Вынгилева, тот рёпитаме порат атыгласанэ. Тав 2013 т҄лт атымьг ёмтыс. Ань ос тав наме к҄сталан щирыл ты выставка щёпитавес.

Александр ВЬЮТКИН



2011 т҄л



Лўим҄ сёрипос
(Северная заря)
№04 (1093), 27.02.2015
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Главный редактор –
Решетникова Р.Г.
Телефон (3467)33-36-82
И.о. заместителя главного
редактора – **Узель В.В.**
Телефон (3467)33-23-09
Редакторы
Теткина Л.И., Мерова Т.С.
Телефон (3467)33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
www.khanty-yasang.ru
Отпечатано:
ОАО «Тюменский дом
печати» г. Тюмень,
ул. Осипенко, д. 81-220

Подписано в печать:
по графику 25.02.2015 г.
в 15.00.; фактически
25.02.2015 г. в 15.00.
Индексы 04399, 54399
Тираж **1750** экз.
Заказ **427**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.